

鄭端簡公奏議

鄭端簡公奏議卷之十二

門人項篤壽校梓

刑部類

奉 旨吳時來張翀董傳策從重擬罪䟽

題爲乞察奸邪以清政本以光安攘大業事浙江清
吏司案呈准錦衣衛鎮撫司手本先該刑科給事中
吳時來題前事奉 聖旨邊臣不忠欺君禍國已處
治了吳時來這廝原非真忠爲主本懷譏怨朕躬事
玄怠政先說一二遠臣次可及於輔首必有主使同
計的又日久奉使不行自以亡命待之抱恨朝廷假

此沽名錦衣衛拿送鎮撫司好生用刑追究主確之
人來說不許支調欽此欽遵又該刑部雲南清吏司
主事張翀奏爲懇乞 聖明亟處大姦巨惡輔臣以
謝天下以靖虜患事奉 聖旨張翀這厮着錦衣衛
便拿送鎮撫司同時來究問來說欽此又該刑部四
川清吏司主事董傳策奏爲姦貪輔臣主持邊師欺
罔誤 國黷貨鉅富大負 聖恩懇乞 宸斷早除
元惡以圖安攘實效事奉 聖旨董傳策這厮着錦
衣衛拿送鎮撫司同時來究問來說欽此欽遵該正
直校尉梁世恒齎帖將犯人員時來董傳策張翀拿

送到司謹遵

明旨好生用刑追究得犯人吳時來

供年三十二歲原籍浙江台州府仙居縣人由嘉靖三十二年進士初任松江府推官三十五年九月行取到京選授刑科給事中招稱嘉靖三十七年二月為琉球國使臣來京乞請封王將時來疏名具奏荷蒙遣差前往琉球國是時來自合恪遵君命恭捧勅旨等項即行前去不合畏懼海道艱險故意在京稽遲就於本年三月內將大同地方總督楊順巡按路楷各行叅論致家將楊順等拿解來京打問是時來又不合自甘罪謫實要脫避前差又行掇拾

浮詞將輔臣并原任吏部郎中萬案等各行叅論又
追究問犯人張翀原籍廣西柳州府馬平縣人由嘉
靖三十二年進士三十五年陞刑部雲南司主事三
十七年三月內是翀在於本部今相遇今在官本部
四川清吏司主事董傳策是翀不思部屬官員自有
本等職業要得出位妄言沽名賣直向董傳策商說
如今各衙門條陳邊政我們也尋幾件事情說說翀
同董傳策各不合將內閣輔臣并原任吏部文選司
郎中萬案等無據事情各具一本於本月二十六日
一同投進致豪將吳時來并張翀董傳策一同拿

送到司好生用刑追究不能隱諱實招前情及又覆
審吳時來張翀董傳策招情無異叅照犯人吳時來
出身甲科叨司耳目奉命出使異國本爲避難以
遲違掇拾無稽浮議却乃沽名而賣直心懷怨私意
在譏君情罪既明法應懲究張翀董傳策各以標
櫟之材均膺部屬之任不思竭忠盡職以報國却
乃肆意出位以妄言朋比尙確而遽陳詆欺君
罔上而黨互行私據法原情罪當併論合候命
下將犯人吳時來張翀董傳策通送刑部從重擬罪
以爲人臣避難懷怨黨互妄言不忠不職之戒等因

題奉 聖旨各犯送刑部從重擬罪來說欽此欽遵
開送到司將吳時來等從重議擬罪犯議得吳時來
等所犯吳時來除在朝官 面諭差遣訐故不行又
與張翀董傳策俱除奏事詐不以實各輕罪不坐外
吳時來張翀董傳策合依各衙門官進呈實封及風
憲官挾私彈事有不實者罪亦如誣告人流徒杖罪
加所誣罪三等罪止杖一百流三千里俱有 大誥
減等各杖一百徒三年俱職官各照例贖罪及查得
開刑條例一款凡捏寫本狀扛幫奏告重事不實者
但問發邊衛充軍合無將吳時來等俱比照前例充

軍案呈到部叅看得犯人吳時來久居諫省未見昌
言將離都門遽生姦計假真忠而詐肆乃巧詆以
沽名不思萬里奉使之榮徒懷一朝亡命之戚前奏
荷蒙聖鑒論劾已行後䟽再瀆宸聰心迹遂露
即其狂悖罪復何辭張紳董傳策濫膺部屬不守官
箴出位妄言惟知賣直恣情瀆奏但欲誣人一片浮
詞初何關於建白敢爲高論未見切乎時宜據法原
情亦應併論該司依律問擬前罪仍各從重照例充
軍似應依擬合無恭候命下將各犯免其徒杖抄
招送兵部定衛發遣惟復別有定奪均乞聖明裁

處嘉靖三十七年三月二十九日題四月初四日奉
聖旨這各犯都發煙瘴衛所充軍但逃殺了欽此

議楊順路楷罪疏

題為緊要邊臣欺君誤國大壞邊防乞賜究

治以圖久安事山西清吏司案呈准錦衣衛鎮撫司

手本先該刑科給事中吳時來題前事節奉聖旨

楊順路楷錦衣衛便差官校拿解來京問欽此該錦

衣衛差官校將楊順路楷拿解到京題奉聖旨各

犯送鎮撫司好生打着問了來說欽此謹遵明旨

好生打着問得犯人楊順供年四十八歲原籍山東

德州左衛人由嘉靖二十年進士初授河南原武縣知縣歷陞大同巡撫右副都御史三十六年三月內轉陞總督宣大兵部右侍郎兼都察院右僉都御史招稱是順到任以來彼有北虜時常犯邊是順不能仰體 聖心竭忠堵截屢次乞 請兵糧荷蒙 准給銀三十餘萬兩該戶兵二部節次解赴大同管糧郎中等官岳粹史闕疑處收備主客兵馬支用又因防守左右二衛并平虜等處奏討銀二十四萬兩該部止發過一十餘萬兩解赴巡撫大同都御史朱笈轉發郎中岳粹等收買芻糧等項各發左右二衛并

平虜等處以備戰守其一應修邊收買草豆錢糧順
係總督官員不與相干又有北虜侵犯大同并圍困
右衛等處是順節次督率將領斬獲首級七百餘顆
已經具題陞賞本年五月內督率標下官軍又在懷
仁斬獲首級一百二十顆赴先巡按御史今在官犯
人路楷紀驗因內驗有灸疤網痕審究獲功官軍斬
獲情由彼各供說前項首級俱係先年投習白蓮教
叛邊勾虜搶掠逆賊有路楷不合聽從報功官軍供
說前因驗作功次分別給賞又將勘功數內奏稱似
亦屬真本年十一月內又有虜賊黃台書妾桃松寨

前來邊口投降到順審係虜中罪婦又不合不察機
宜輒自准降奉送兵部彼因黃台吉等來邊詐說要
將丘富易換桃松寨是順不合聽信詐說將丘富情
由具奏以致兵部仍令原解姚天祿等將桃松寨押
回居庸關外本年十二月內到於陽和白登地方有
桃松寨等知覺遁走出邊去訖有姚天祿將情具稟
撫按有路楷將伊捉獲發行朔州兵備副使薛騰蛟
處取招問罪未曾回詳以致遲延具奏原無撥軍
送與虜營并饋送銀兩情由今被刑科給事中吳時
來叅劾前來拿送到司今蒙研審打問明白不能隱

諱審招前情及審路楷招同叅照犯人楊順叨居總
督寄重兵戎正宜攄忠圖報以舒宵旰之憂却乃
行事張皇有疎邊防之務衛城久困不破格以解圍
村堡傷殘徒彰功而自伐虜婦逃走國體有傷邊民
困窮人情罔恤其情已著厥罪難逃路楷巡按兩鎮
耳目是司知虜婦之既逃當據法以實奏勘首功
以從疑致人言之可指憲體罔諳罪應同科及據楊
順供稱大同請發過銀兩皆由管糧郎中收掌出
入有無侵剋冒破彼有案卷見存可查所斬幼丁灸
疤網痕首級并獲功官軍俱在大同吊取查究真偽

難掩桃松寨等出邊原在白登地方撥軍三千及銀
路楷銀兩七千人衆賊多行查立見所據楊順等供
招前情相應差官查勘明白具奏 聖明處分庶使
邊方之臣有所警懼合候 命下將犯人楊順等容
令本司監候伏乞 勅下科道衙門選差公正官各
一員請 勅前去大同地方將吳時來所劾楊順路
楷事情逐一查勘明白從實具奏恭候 聖裁惟復
將楊順路楷通送刑部從重擬罪以爲人臣欺 君
誤 國大壞邊防不忠不職者之戒等因題奉 聖
旨各犯送刑部從重擬罪欽此欽遵開送到司看得

楊順招稱到任以來比虜時常犯邊是順不能仰體
聖心竭忠堵截又據錦衣衛鎮撫司叅稱楊順行事
張皇有踈邊務衛城久困村堡傷殘及叅路楷看首
功以從疑致人言之可指等情各是的又要將楊順
等通送刑部從重擬罪以爲人臣欺君誤國大
壞邊防不忠不職者之戒等因前來謹遵明旨將
楊順等從重議擬罪犯議得楊順等所犯楊順合比
依守邊將帥守備不設爲賊所掩襲因而失陷城寨
者律斬秋後處決路楷依奏事詐不以實律杖一百
徒三年路楷被劾接受楊順餽送銀兩數多及楊

順侵欺官銀妄殺平民各情罪深重該衛鎮撫司以
事在彼中要行查勘今已遵奉 欽依將二犯問擬
前罪所據路楷若果有前項賊私止依前擬未盡其
辜合無將二犯一併監候仍乞 勅差科道公正官
各一員前往彼處將楊順路楷等前項事情逐一查
勘明白從實具奏如路楷等所犯果與論劾相同再
行查照律例從重別議等因案呈到部叅看得犯人
楊順謬叨總督之任全無保障之才墻外城外盡爲
寇之巢穴官堡民堡無復我之藩籬逾年累月經略
無聞揜罪飭功真偽莫辨欺 君禍 國 聖明已

燭其奸玩寇殃民神人共憤其惡若不寘諸重典何以振飭邊方犯人路楷列官耳目事務雷同行役邊陲全無風采論功則前後異說論罪則督撫殊科清議難容官箴有玷若果受賄是實應坐侵盜之條必額差官勘明不致法網之漏該司謹遵 明旨將二犯問擬前罪仍乞差官體勘如有重情另行別議情法相應合無恭候 命下將二犯查照前擬路楷先行吏部革職與楊順一同監候仍乞 勅下科道衙門選差公正官各一員前往大同地方將二犯前項被劾失事賊私等情逐一從實勘明具奏上請以俟

宸斷惟復別有定奪均乞 聖裁嘉靖三十七年三月二十九日進奉 聖旨楊順路措且都監着便差給事中一員會同巡按御史將奏內事情實查勘來說該部知道

薦文武官疏

題爲懲前慮後陳愚見以裨邊務事准兵部咨節開該工科給事中徐浦題前事內一件舉將才以備任使奉 聖旨兵部看議了來說欽此欽遵看議得給事中徐浦所題相應依擬合行在京九卿官限半月以裏各要虛心採訪但有忠勇過人智略出衆及明

習天文諳練邊務可備軍旅之用將帥之選者不拘
文臣武職見任革任緣事聽勘及山林隱逸微賤各
疏名具薦兵部議擬上請定奪仍不得濫舉匪人
致滋請託違者聽本部及科道官叅究治罪等因題
奉聖旨是欽此欽遵備咨到部臣等虛心採訪得
見任革任文臣武職可備軍旅之用將帥之選者凡
一十員如原任山西叅政胡松材可剴煩智能應變
勞績已徵於太原方略備見於章疏力田糊口匪徒
適軸之良閑戶沉思可謂干城之器原任春坊贊善
羅洪先學以廣才而心迹光明志以帥氣而德性堅

定覽究孫吳之書端諒有識習知占步之術朗達不
踈原任應天巡撫都御史今充軍曹邦輔持已清方
賦性忠勇身先士卒甘苦相同惠及瘡痍錙銖不擾
追南京流劫之寇殄戮無遺却監督橫逆之求中傷
有自大同先致仕今代副總兵尚表年力未衰忠勤
茂著出奇以挫賊鋒俘馘具在行間以携賊黨營帳
漸移竟收保障之功皆其鼓舞之力五軍營副將雲
冒昔充總帥累建奇功今在京營申明師律老成練
事閑望夙著於同儔精神折衝姓名久馳於異域薊
州副總兵馬芳膂力方強騎射出衆發身行伍能識

士卒之情歷樹戰功備嘗險阻之味邊境服其恩信
虜衆畏其驍雄大同間住叅將趙臣聞鼓鼙之警嘆
髀肉之復生懷桑梓之憂即纓冠而往救方醜虜窺
城之際勵氣巡城迨接兵入餉之時乘危轉餉獨石
叅將劉漢守上谷之東隅孤懸足倚扼漁陽之西界
斤埃甚明勞苦當一面之衝果毅衛三軍之帥宣府
叅將郭鎮蚤肄韜鈴夙秉壘壁先驅後殿綽有虎視
之威合騎分營累挫鷗張之寇原任叅將黃演膽氣
雄豪弓馬閑熟繕修關塞經理屯營處危地而結陣
完師遇勦敵而鼓勇決戰以上各官雖文武不同職

任亦異要皆練達時務曉暢戎機有勇有謀可戰可
守者也再照永樂中百戶孫岩退閒子亨替職岩復
起用歷官都指揮使封應城伯稱為功臣成化中遼
東巡撫馬文升充軍起用歷官少師吏部尚書稱為
名臣即今高倭北虜尚在用兵欲求所以上體 聖
心下安民庶惟有用人最為急要是應破格超資取
新求舊務集僉謀用收群策如蒙 勅下吏兵二部
再加詳議如果臣等所薦原非濫舉徒滋請託即為
酌量叙錄擢用起用見諸施行臣等不勝幸甚伏乞
聖裁緣係懲前慮後陳愚見以裨軍務事理未敢擅

便謹題請 旨嘉靖三十七年五月十三日進十五日奉 聖旨該部知道欽此

明職掌疏

題爲明職掌以平刑獄以一政體事山西清吏司案呈奉本部送貴州清吏司主事鄒光祚呈奉本部劄委本職管理嘉靖三十七年春季紙劄查得 內翰林院五軍都督府吏戶禮兵工五部通政使司大理寺 宗人詹事等府鴻臚光祿等寺吏科等六科翰林院尚寶司國子監太醫院四夷館行人司及 內府司禮尚膳等監承運針工等局春秋二季并本部

十三司四季舊額該支紙劄共一百一十三萬六千八百三十七張俱於本部十三司問過囚犯官民告紙內支給本部近因詞訟既簡紙劄甚少各衙門應用紙數日逐候領似不可缺呈乞處等因到部送司伏覩 大明會典一款吏戶禮兵工五部及大理寺歲用紙劄刑部關支不敷於都察院見收類解紙劄內關用如又不敷并刑部題奏本紙俱於兩法司支贓罰銀兩買辦又一款吏戶禮兵工五部凡有應問罪人不許自理俱付刑部又一款五城兵馬司凡巡城御史批發囚犯該司取供送法司擬罪發落又查

得成化年間該都察院題 准兩京法司接受詞訟

與在外不同在京一應大小詞狀例該通政司受送

各衙門施行至如巡視等項御史縱有分內當行詞

訟俱送該城兵馬司轉送刑部問理又查得嘉靖三

十三年該南京刑部尚書顧應祥條陳四事內一件

明職掌查得問刑條例南京詞訟干係地方者除內

外守備官受理其餘一應詞訟悉赴南京通政司告

送法司問理近年以來事體漸更各衙門自受詞狀

撥之政體甚非所宜一件處紙劄照得南京各衙門

紙劄該刑部取用今北京紙劄刑部都察院各管半

年南京既有巡撫操江都御史又有六科巡城等衙門准理詞訟本部不特紙價不敷雖贓罰無所於處祺該本部議題奉 欽依行南京府部及守備等衙門凡軍民詞訟俱赴通政司告送法司問理不許一槩接受其紙劄各衙門隨數多少酌量均支如再不敷許於入官贓罰銀內動支買補等因通查案呈到部看得該司呈稱各衙門紙劄不敷欲要查議一節為照該司所呈雖為紙劄不敷然實侵奪職掌以致刑獄冤濫政體紛更非細故也在京各衙門歲用紙張春秋二季例該一百十三萬六千八百三十七張

以每年三百六十日該紙三千一百五十七張俱於本部十三司問過囚犯名下取給今通政司送到狀詞每日少則一二張多則不過六七張於內又有例不該准者詞狀紙劄贓罰通爲一事先年紙劄不敷許動支贓罰買給今詞狀既少紙張亦少贓罰豈得獨多以故累年紙劄不敷動支贓罰年復一年贓罰無幾一二年間必罄竭又將何以處之切緣在京一應大小衙門人犯俱應叅送法司問理大明會典開載甚明近來各衙門不遵成憲各受詞狀徑自發落紙劄贓罰通無查考甚至強竊盜賊止送人犯

開職仗人命威逼量追埋瘞不送問擬笞杖以下
不據論矣其間類多在縱徃徃具告通狀送部因而
平反者甚多夫輦轂之下聖明在上一應詞訟
既不由刑部問擬又不經大理寺評允越職侵官任
情廢法踵弊效尤肆無忌憚職等待罪刑部知而不
言是爲失職况四海之內孰非朝廷赤子而神
州赤縣百萬生靈尤爲最切近者今各受詞狀拘提
禁繫垂楚結斷甲可乙否此重彼輕致使良善苦於
紛拏刁潑喜於詐害是小民之不安其生又有甚於
法司之不得其職矣職等直因紙劄缺乏一事究極

弊源冒昧上陳伏乞 聖明申飭在京衙門務要

各安分守欽遵 大明會典及成化年間嘉靖三十

二年部院題 准事例凡軍民詞訟俱聽赴通政使

司告送法司問斷不許逕自受理各衙門有應問人

犯俱要叅送法司不得逕自決發其巡視五城批送

兵馬司人犯除情輕無可結正就彼量情發落外若

係杖徒以上罪犯亦要叅送法司問擬通送大理寺

審允發落庶幾職掌既明刑獄清平政體歸一臧罰

銀兩不致乾沒年季紙劄亦能取辦矣嘉靖三十七

年六月初一日進初三日奉 聖旨是在京軍民詞

訟各衙門并巡城御史不許徑自受理今後故違的
你每查叅來說欽此

叅叅將周現數

題爲急處分守將官以明夷夏大防事山西清吏司
案呈准錦衣衛鎮撫司手本該兵部題總督宣大尚書
楊 題前事奉 聖旨兵部看了來說欽此看得總
督宣大尚書楊 題稱分守大同北西路叅將周現
先年開立馬市往來俺荅營內結納今守拒門等堡
與虜爲鄰若欲令其分閫是地臣寔有所不安乞要
本官革回原衛閒住或發陝西總督王夢弼不必授

以職守從宜要用隨營截殺遺下員缺另推一節爲
照大同北西路地方近虜巢穴關係甚重儻或任用
匪人貽患不輕今照叅將周現先因開立馬市出入
虜營事在既往姑未查究若復再用此地恐必終任
故智蠹壞邊防既該總督尚書楊會同鎮巡官張
承勛楊選議奏前事相應依擬等因題奉聖旨周
現既與虜通着總督軍門拿解來京問員缺即便推
補欽此續該尚書楊將周現拿解前來題奉聖
旨錦衣衛拿送鎮撫司打着問欽此欽遵謹遵明
旨打着問得犯人周現原籍陝西西安後衛人招

嘉靖二十一年投與已故鎮守大同等處地方總兵官周尚文爲家丁管領未到官一般家丁馬柰等一百餘名跟隨周尚文隨軍殺賊嘉靖二十四年失記月日是現擒獲僞表降虜逆犯衛奉等有功蒙總督衙門具奏兵部覆題將現擬陞本衛正千戶仍充家丁跟隨本官在邊殺賊嘉靖二十七年失記月日有大勢達賊侵犯曹太師庄現隨本官與賊對敵彼現斬獲有功蒙陞指揮僉事二十八年本官病故現仍充家丁跟隨本地方總兵官孫仁等隨軍殺賊嘉靖三十年四月內有兵部左侍郎史道前來宣大

等處督同鎮巡等官開立馬市將現并一般家丁張元相等四名取討部下俟候聽用彼時初開馬市無人通報虜營議開馬市緣由有史侍郎因見現在邊年久熟知虜情將大紅藍綠等段八匹差現同未到官通事張文學等齎持前去俺荅營內與定馬市日期後有俺荅男脫脫等衆向邊講求糧米方肯開易馬足有史侍郎等又令現前去虜營向俺荅等傳說如今 朝廷止開馬市未曾奉有給賞種米 旨意難便依從往來三次與虜講允於四月內有史侍郎等在於宣府地方五月內在於大同地方開市俱現

往來通說彼時僉荅等 進馬九疋有史侍郎又差

現前到虜營荅伊大紅段等一十八疋彼時事畢有
史侍郎將現以開馬市有功題陞指揮同知仍在邊
聽用於嘉靖三十三年八月內推陞岷州守備三十
五年九月內推陞延綏遊擊將軍彼時開互馬市是
現承使出入虜營自合竭盡忠誠宣布 朝廷恩威
爲當不合乘機懷私交結以圖濫授職級嘉靖三十
七年三月內又蒙兵部將現推陞大同北西路叅將
轄守拒門等堡有今總督宣大軍務兵部尚書楊
因見現所守拒門等堡逼隣虜地委係緊要地方慮

現先年充當家丁開立馬市之時出入虜營深相結
納恐現仍前通虜貽患地方將現叅劾前來拏送到
司打問明白不能隱諱實招前情叅照犯人周現出
身行伍叨任邊官正宜攄忠殫力報稱爲當乃敢因
開馬市出入虜營懷奸欺而結虜售私假使令而往
來無忌緣此而大壞邊防因循而釀成虜患深背

皇上隆恩不畏祖宗國法誤國不忠莫此爲甚
揆其所犯律法難容合將本犯送刑部從重擬罪以
爲邊官懷私結虜大壞邊防者之戒等因題奉聖
旨送法司從重擬罪欽此欽遵開送到司看得犯人

周現招稱在邊年久熟知虜情彼時開立馬市承使
出入虜營懷私交結濫授職級及杏錦衣衛鎮撫司
叅其懷奸欺而結虜售私假使令而往來無忌緣此
而大壞邊防因循而釀成虜患等情前來查據前項
招叅情由周現出入虜營互相買賣雖稱公使實同
私交及查得問刑條例一款但有漢人交結夷人互
相買賣引惹邊釁貽患地方者問發邊衛永遠充軍
將周現從重取問罪犯議得周現所犯合比依私出
外境者律杖一百照例抄招送兵部定發邊衛永遠
充軍所據本犯與虜相通事情重大但據招叅情節

問擬前罪中間恐有別項事情法應盡究合無將本
犯監候移文大同督撫衙門再行嚴查若有走泄事
情透漏軍機實跡徑白具奏再行查照議擬施行等
因案呈到部叅看得犯人周現初以習知虜情奸謀
出入因而交通群醜饋遺往來邊臣倚之爲爪牙乃
撤藩籬而延寇盜黠虜委之以心腹敢移營帳而扣
門庭誤國負恩懷奸釀禍華夷之防安在臣子
之義已虧况越陞千戶歷陞叅將官賞實爲踰涯自
已立功自己犯罪襲替尤爲有碍該司問擬前罪仍
照例充軍情法相應合無恭候 命下將本犯查照

前擬監候仍行督撫衙門嚴查若有走泄事情透洩軍機實跡再行具奏議擬如無別情將本犯送兵部定衛發遣庶法令昭明而人情畏懾矣惟復別有定奪嘉靖三十七年六月初二日進初四日奉 聖旨周現依擬發遣欽此

叅武選郎中盧岐嶷疏

題為查欺玩清選法以肅官箴事山東清吏司案呈奉本部送刑科抄出該兵科署科事給事中何燧等題前事奉 聖旨盧岐嶷并吏書法司提了問趙味蒼嚴拿一併問擬來說江東既回部未久免究欽此

又該兵部左侍郎江東等奏爲乞 恩認罪改正比
試事奉 聖旨法司知道欽此俱抄部送司謹遵

明旨行南城兵馬司提取盧岐嶷邊世清張泮全及
行隆慶衛嚴拿趙昧各呈解前來問得犯人盧岐嶷
年四十四歲原籍福建長泰縣人由嘉靖二十三年
進士歷任兵部武選清吏司署郎中事主事招稱在
官張泮全不合故違主文久戀衙門事發有顯跡情
重者民發附近充軍事例一向挨入本司結攬寫發
文案熟慣作弊三十六等年十二等月該兵部題爲
比例乞 恩以圖補報事俱荷蒙 聖慈寬宥將岐

疑切責罰俸岐疑自合感

恩夙夜敬慎勉思報稱

本年四月內承准後軍都督府照會開送直隸隆慶
衛右所不在官患疾世襲百戶趙溢伊在官堂弟趙
咏借職供結緣由到部送司該岐疑審得趙咏例應
替職選後比試隨具稿呈堂看訖轉發在官吏邊世
清同張泮全謄寫題本比趙咏畏懼比試不合故違
黃緣沮壞選法者令餘發邊衛食糧差操事例將銀
二兩四錢與邊世清六錢與張泮全行求攬改邊世
清不合故違吏受財枉法滿貫者發附近衛所充軍
事例與張泮全俱不合枉法接受入已邊世清計將

原擬選後比試字樣令張泮全改寫比試得中併將
原稿扣改以圖掩飾岐嶷不合怠玩不行查對明實
輒就封進奉有欽依隨准兵科手本行查趙味
何年月日比試岐嶷始知前弊行南城兵馬司提審
邊世清張泮全問該兵科給事中何燧等及兵部左
侍郎江東各具本叅奉欽依抄部送司行提岐嶷
等前來審問前情明白遇蒙本年四月二十八日
恩例徒罪以下便減等擬審及查得問刑條例一款
法司每年會審之期雜犯死罪准徒五年者一體減
去一年將盧岐嶷等取問罪犯議得盧岐嶷邊世清

張泮全趙昧所犯邊世清張泮全俱合依受財枉法者邊世清八十貫律絞係雜犯准徒五年張泮全四十五貫無祿人減一等律盧岐嶷依奏事不實者律與張泮全各杖一百徒三年趙昧依有事以財行求得枉法者計所與財坐贓論二百貫律杖七十徒一年半盧岐嶷張泮全趙昧俱有大誥又與邊世清俱遇蒙恩例邊世清減徒一年盧岐嶷等通減二等盧岐嶷張泮全各杖八十徒二年趙昧杖一百盧岐嶷係官趙昧係舍人邊世清係吏張泮全係民各照例盧岐嶷趙昧各納米贖罪邊世清張泮全免其

徒杖與趙昧俱抄招送兵部邊世清張泮全俱定發
附近衛所充軍趙昧調發邊衛食糧差操照得犯人
盧岐嶷職任長官不能鈐束吏書以致前弊似難照
常發落等因案呈到部看得該司問擬犯人盧岐嶷
邊世清張泮全趙昧各前罪參詳律例俱合似應依
擬及參照犯人盧岐嶷鈐選是司檢防不慎官舍得
以行財吏書因而枉法上厓 御覽奏牘可徵自取
人言改正無及委難照堂發落合候 命下將盧岐
嶷量加降調邊世清張泮全趙昧查照前擬發遣發
落惟復別有 定奪均 聖裁嘉靖三十七年六

月初三日進初五日奉 聖旨盧岐嶷著調外任用
邊世清等依擬發遣發落欽此

叅福建巡撫阮鶚疏

題為極大貪墨撫臣黷貨殃民乞 賜重究以快人
心以勵臣工事福建清吏司案呈准錦衣衛鎮撫司
手本該兵科給事中劉祐題前事奉 聖旨這廝着
錦衣衛差官校拏解來京問欽此續該刑科抄出原
任巡撫福建地方都察院右副都御史阮鶚為籲天
陳情懇乞 聖明辯察極寃事奉 聖旨鎮撫司知
道欽此隨該錦衣衛百戶譚宏將阮鶚拏解到京題

奉 聖旨送鎮撫司打着問了來說欽此謹遵 明

肯打着問得犯人阮鶚原籍直隸安慶府桐城縣人
由嘉靖二十三年進士初授南京刑部廣東司主事
改任都察院河南道監察御史歷陞浙江按察司副
使嘉靖三十五年三月內為因剿倭有功鶚蒙 聖
恩欽陞都察院右僉都御史巡撫浙江地方招稱本
年三月內有倭寇暴至乍浦彼時部咨未到鶚聞賊
至即行星馳臨陣破賊解圍四月內有徐海等圍困
桐鄉縣城垂破鶚入城設禦用火箭射燒賊死千人
桐鄉圍解五月內提兵渡江擒斬賊八百餘名顆六

月內又斬仙居賊首一百餘顆七月又提兵嘉興本
月內又在沈庄及丘家洋等處斬擒倭賊三千餘名
顆已經具題節蒙 賜勅獎勵後陞巡撫福建右副
都御史三十六年二月內倭賊又犯福建洪塘等處
鶚即星馳到省率兵退賊巡按御史吉澄具本奏稱
鶚聞 命馳來入閩未旬方爾殫力經畫而群寇突
至遂督兵出城旅食野宿躬涉風濤親冒矢石微服
間道艱難備嘗奏抄在部有無買倭情節自見彼賊
又犯玄鍾月港鶚又提兵直抵南澳計擒賊黨數百
有吉御史將失事指揮顧喬嶽等問究招衆已經題

奉 聖旨兵部知道當時人所共見豈能隱蔽賊情
又賊犯福清等處當令僉事盛唐統領土官黃仲金
等圍剿三日晝夜對陣斬首五十三顆該巡按御史
樊獻科具本奏稱始而慮事未終難免失事之責既
而追捕畢力已矢克勝之謀究其罪固難辭要之功
亦難泯矧海防久廢之餘值此方張之寇而我兵能
斬獲過半亦福建年來僅有之捷蒙 欽賞土官并
僉事等官銀兩表裏鶚原未親督家丁圍剿並不知
妄殺平人報功亦不曾用金花紅段改機買陣等情
軍門雖有銀花紅絹銀牌止是犒賞有功人員激勵

將士原因福建地方各項錢糧缺乏供用軍需委的
那措無策鶚不合於提編徭甲之內酌量銀力通融
派取以濟時艱一應錢糧分巡道稽查分守道給單
按察司掛號布政司收給今年二月內該司始呈巡
按衙門動支非鶚一人所掌鶚並無布政司取銀數
萬兩該司冊籍見在一一可查生員林念原係效力
殺賊入數家丁數千亦是調來客兵分隸各將收養
殺賊宿歇民間原非私養鶚委的才識庸鄙見得地
方連年倭患軍門供用缺乏不合擅於提編之內徵
添各項銀兩以致軍門怨望傳聞京師今被給事中

劉祐叅劾前來拿送到司打問明白不能隱諱寄招前情所據本犯供招到官不敢准信當用手本前去兵部該司將御史吉澄焚獻科奏抄通行吊取到司詳查覆審本犯與供相同本抄見存可據叅照犯人阮鶚職任巡撫權寄兵戎當先思民間疾苦以優示存恤却專爲軍需供用而擅加提編其倭夷屢犯且未盡剿清之常謀而客兵騷擾委不聞鎮綏之良策有負朝廷愛民之德殊無以身報主之心被論事雖有巡按奏詞之可據詳其罪難免國法所在之當懲合候命下將阮鶚并兵部吊來巡按衙門

奏抄通送法司再加詳審依律擬。奏請發。

復再勅差去查盤科道官覆勘回奏等因題。

聖旨着法司擬罪來說欽此欽遵開送到司將阮鶚

議擬罪犯議得阮鶚所犯合依因公擅自科歛所屬

財物賊論五百貫之上罪止杖一百徒三年有大

誥及遇蒙欽恤恩例通減二等杖八十徒二年係

堂上官照例運炭贖罪案呈到部參看得犯入阮鶚

猥以庸材謬膺重寄昔在浙江頗聞勞績改任福建

頓損功名徒知盜賊之縱橫軍餉爲急豈思閭閻之

疾苦勞費甚多派銀力不論重輕編徭甲不分年月

雖云有因之科歛實爲無藝之徵求既拂人情遂滋
物議若止照常發落未盡其辜合候 命下將本犯
抄招送吏部革職發回原籍爲民以示懲戒惟復別
有 定奪均乞 聖裁嘉靖三十七年六月初七日
題初九日奉 聖旨阮鶚着革了職發回原籍爲民
欽此

覆南京刑部詞狀疏

題爲盜越都城劫獄懇 恩究治官員事該南京刑
部尚書馮岳等題 云云再照前項反獄事由將囚逮
繫經年釀成劇盜乘時起禍賊既逃去千里纔將全

孽叅送法司皆由委官無狀群小縱橫之故也官不奉法吏弊益滋皆由職掌不明統轄無紀之故也若囚不反獄該科無言雖有守備衙門之批法司終於不送則兩縣之作弊如故張沛等之受枉何伸再照京師一應獄訟可出多門與外省何異百里之外詞狀司官受理於體制奚存是皆所謂舛也臣等查得大明會典內一款吏戶禮兵工五部凡有應問罪人不許自理俱赴刑部鞫問景泰六年都察院奏准南京各衙門內外守備等官除所屬軍衛衙門及各營廠不係緊關重事許令受理量情發落若事情頗重

及干碍民者俱不許一槩濫受悉令南京通政司告
送法司亦不許發應天府問理正統十三年奏准凡
巡視等項御史若係該管事有奸弊依法受理送問
其告爭田土婚姻錢債及一應不係該管事內詞訟
不許接受問刑條例一款弘治十八年三月初四日
節該欽奉 孝宗皇帝聖旨今後捕獲強盜不許私
下擅自拷打俱送問刑衙門務要推究得實若徇私
扶同致有冤枉一體重罪不饒欽此又一款戶婚田
土鬪毆人命一應詞訟悉照舊制赴南京通政司
告送法司問理嘉靖三十一年該刑部覆題本部尚

書顧 所奏申明前列奉 聖旨准議欽此欽遵

國家成憲種種具載各衙門樂於因循難於守法將拏獲強盜及一應輕重罪囚不送法司問理多發五城與兩縣耽閣月久因緣為奸致根本重地累次反獄遠近驚駭地方弗寧深為可慮宜乎該科之有言也除百里之外詞訟已嚴行禁革不許該司准理外仍行各該衙門將一應刑名遵照 舊制除事有關涉量情發落之外其餘事頗重者俱要送問及干碍民間者不許接受仍將兩縣與五城問過刑名容臣等查考敢有奉法不公致獄囚反叛貽害地方者叅

拏究問及前反獄強盜三起不下二十名逃去將及
一年尚無一人得獲若不剪除深惡日深恐滋後患
着落兩縣與該城各接管官并巡捕官竊昧等多方
設法密切擒捕務在得獲如再半年不獲住俸一年
不獲叅究合無恭候 命下之日將劉壽吳啓東提
問劉以真等送南京大理寺審允回報查發惟復別
賜定奪仍乞 勅刑部將臣等奏內條例事情再加
詳議如果不謬 俯允所 請一一施行庶事體歸
一而刑獄自清下民知畏而地方亦安矣等因奏奉
聖旨刑部知道欽此欽遵抄部送司案呈到部看得

云云 又叅稱前項反獄事由將囚逮繫經年釀成劇盜乘時起禍賊既逃去千里纔將余孽叅送法司皆由委官無狀職掌不明乞要申明節年事例將拏獲強盜及輕重罪囚通送法司問理嚴行禁革各衙門一應刑名遵照 舊制俱要送法司問不許徑自接管仍將兩縣及五城問過刑名逐一查考敢有奉法不公致獄囚反叛貽害地方者叅拏究問各一節爲照前項問擬過犯人劉以真等五十四名口叅詳律例俱合及照行事理亦已明白相應依擬指揮劉壽千戶吳啓東相應提問及再照兩京法司專理詞訟

職掌攸存載諸大明會典與節年題 准事例不

許兩京各衙門接受詞訟俱赴通政司告送法司問

理近年以來兩京各衙門徃徃不遵 成憲各受狀

呈徑自擬斷以致刑獄枉抑甚多即此南京反獄一

事關係不小况南京刑部尚書顧 纔於嘉靖三十

二年為因南京各衙門違例受詞題奉 欽依禁約

未及六年遽敢踵弊效尤故違 明旨委的肆無忌

憚近該臣等為申明職掌以平刑獄以一政體事題

奉 聖旨在京軍民詞訟各衙門并巡城御史不許

徑自受理今後故違的你每查叅來說欽此欽遵今

該南京刑部尚書馮 等亦因南京各衙門濫受詞狀以致強賊越獄乞要申明職掌題 請前來與臣等所言事體相同若不通行禁革在南京各衙門未免越職侵官任情廢法政體不一刑獄不平有碍施行亦應申明嚴加禁約云云 仍乞 皇上天語叮嚀南京大小衙門凡有詞訟不得輒自受理俱要赴南京通政司告送法司其經獲強盜重事俱要隨即叅送法司問斷兩縣五城間過刑名俱聽該部逐一查考各衙門如有仍前接受詞狀不行送問兩縣五城敢有奉法不公致獄囚反叛者貽害地方者俱聽該

部一併指實叅奏究問以示懲戒庶兩京法司政體
齊一而刑獄清平矣嘉靖三十七年六月十三日刑
部尚書鄭 等具題本月十七日奉 聖旨是楊名
等監候處決其餘依擬發遣發配發落劉壽等提了
問今後南京詞訟俱送法司問理各衙門不許濫受
欽此

會看查勘侍郎吳嘉會修邊疏

題為不忠輔臣修築邊牆冒破錢糧不堪保障懇乞
追治以懲欺怠事山東清吏司案呈奉本部送科抄
出 欽差禮科等衙門有給 事中等官袁汝定等題

前事先該巡視山海關等處監察御史萬民英題稱
原任順天巡撫今陞兵部左侍郎吳嘉會修理牆子
嶺等處邊牆低薄致賊拆毀突入搶掠乞要差官查
勘等因節奉 聖旨吳嘉會着錦衣衛拏送鎮撫司
監着便差科道公正的各一員去從實查勘來說欽
此欽遵隨奉 勅前去查勘得牆子嶺迤東白馬關
迤西沿邊一帶邊牆自嘉靖三十年起至今止三道
十區軍民雇募夫匠修完原議續議創修拆修邊牆
共一萬三千一百八十丈三尺四寸敵樓五座券門
一座墩臺四百七十七座房五百三十六間剝崖八

千四百二十三丈三尺九寸水門八座警門五座內
堪以防守邊牆五萬九千八百八丈六尺五寸坍塌
低薄不能禦賊邊牆二千七百一十九丈六尺五寸
墩臺三座計節年請發過銀米并舊儲銀兩共五十
四萬六千三百三十五兩三錢有零除用過銀三十三萬
八千二百三十三兩九錢有零米銀三萬二千七百
九十九兩九錢六分支剩見在銀七萬六千一百六
十兩一錢有米三千四百六十七石六斗有零其餘
俱委官指揮邵世勲等各侵欺又查得裏口不合丈
尺應該扣除鹽米工價除已扣外仍該扣追銀三萬

一千七十五兩有零米七千七百四十三石有零及
稱前項應役軍夫皆苦寒戍卒就食貧民所給裹口
工食雖稱過多其間存亡遷徙難以按籍追求恐生
騷擾要將三十四年以前散過者免追其三十四年
以後仍行查追及叅稱吳嘉會不思邊方重務聽憑
委官修築其堪保障與否漫不經心以致于家衝等
處低坍不堪不念錢糧重務聽憑委官侵剋濫支其
應扣存與否略不稽察以致邵世勲等官侵剋無忌
往年寬佃谷以無墻而失事河流口以墻薄而潰防
險多失於上游禍兩延於內地及又假以軍前聽用

撫賞爲名撥取三十六州縣庫藏爲之一空和同叅
游守備官接受百數十之將領饋送難以數計據修
邊銀兩雖無侵剋之情論別項賊私難掩貪汙之迹
且多方彌縫三叨 恩蔭罪過深重 國典奚逃所
當據法問擬及又叅稱原任總督今致仕侍郎何棟
墻垣未覩全功邊方何賴疆圉日見多事民害滋深
大開賄賂之門倍取舖商之直先該言官論列致仕
亦當再追論原任巡撫僉都御史今聽調張祉苟且
支持於邊城錢糧多踵其前弊已經奉 旨降級調
用似難再議總督王忬在任漸久督修亦多稽察雖

詳踈虞亦有但效有勤勞及總督楊博歷任未久俱應免究原任兵備副使等官劉燾王輪趙文耀李纂張敦仁趙忻馬珮同有保障之責並燕糾察之司苟且塞責以致工程錢糧弊端種種論罪同歸於曠廢據法並宜於罰治內李纂已經致仕馬珮宜錄微勞見任兵備趙介夫楊輒賢張子順覈其錢糧案卷出納俱清計以裏口工程給散稍過以上俱應免究原任叅將等官王臣等八十三員俱有提調修牆之責經書自踈於信地令後不嚴於衆工指揮僉事邵世勲等三百六十員名明知邊方錢糧例嚴監守之罪

顧復計懷狗鼠自干法典之誅侵欺既已數多剋減
又俱情實內邵世勲等先經各衙門叅問仍聽原案
歸結其餘各犯及王臣等俱行各該巡按御史就便
問擬等因題奉 聖旨刑部會同兵部看了來說欽
此欽遵抄出送司案呈到部臣等謹遵 明旨會同
兵部左侍郎臣江東看得禮科右給事中等官袁汝
寔等題稱查叅遇吳嘉會等修築邊牆緣節歲自干
法律罪應首論原任總督何棟官雖去任事曾經手
督撫相關亦應併論原任巡撫張祉見任總督王忬
楊博見任兵備副使趙介夫楊輒賢張子順各歷任

未久效有微勞相應免究原任兵備副使等官劉燾
王輪趙文耀李秦張敦仁趙忻馬珮原任叅將等官
王臣等八十三員俱係去任遷官事發依律勿論其
邵世勲等三百六十員名雖有侵欺剋減情弊但事
歷多年干礙人衆且防秋在邇相應酌處移咨都察
院轉行巡按御史就近提問仍須分別贓私多少情
罪輕重應追究者追究應末減者末減詳加議擬毋
令枉縱其三十四年以後散過軍民夫匠人等工價
鹽米等項括總計算銀兩雖多逐丁扣追錢貫亦少
况畿輔近地徭賦繁難重糧赴邊力役勞苦合無

通照三十四年以前一體免追以示 朝廷撫綏之意但 恩威出自 朝廷惟復別有 定奪均乞 聖明裁處嘉靖三十七年六月初一日題初三日奉 聖旨這事情既查勘明白矣嘉會革了職發回爲民何棟着冠帶間住張祉趙介夫等劉壽等免究邵世勲等巡按御史提問分別具奏軍民夫匠工食依擬免追欽此

看議知府宿應麟等疏

題爲叅究違慢官員以示懲戒以重大工事浙江清吏司案呈奉本部送刑科抄出該巡按浙江監察御

史王本固題前事據浙江布政司經歷司呈奉本布
政司劄付覆查得本司先於嘉靖三十六年七月十
三日抄蒙浙江徽州等處採木工部李郎中案驗派
買木植查議呈允劄行分派嚴州府採辦鷹架木六
百八十五根平頭木一千三百三十根杉條木二千
八百三十五根杉槁木二千六百二十五根共七千
四百七十五根委推官宋璘縣丞戴裴黎滾採買派
僉大戶一十八名解戶水手各五十七名該府於八
月二十一日申送委官大戶到司領文買木及陸續
解送解戶水手前來節蒙本部案牌行催備文催據

該府於本年十月初四日申准推官宋璘牒稱先買完杉條槁木二千根又委建德縣縣丞張翊於本縣山場砍號杉條槁木八百餘根又於本月十二日申報買完二等鷹架一二等平頭并杉條槁木七千一百二十二根及據推官宋璘呈稱初次買完前木九月二十三日牒府轉詳并報二次買完木數前來十一月初九日又據報完鷹架大木三百四十三根并原派木植俱已買完本司行委理問林簪會同原買木官宋璘驗烙於本月十一日先撥鷹架木二百根平頭木八百根杉條木二千八百三十五根杉槁木

一千六百二十五根共六千四百六十根批差官解
張翊等又於本月二十二日據報驗烙完足又將鷹
架木四百八十五根平頭木五百三十根批差官解
戴裴等各領解俱赴部交納去訖及查原申知府宿
應麟於本年九月十一日瘳疾舉發倩醫饒德調治
未痊十月十八日同知龍興到任將印信關令署管
本月十九日採木李郎中經過本府宿應麟卧病未
出是同知龍興率領官吏人等迎送又申開知縣洪
英明先於八月十三日奉分守金衢嚴道行委查盤
蘭谿縣倉庫錢糧本官於十七日離任前詣該縣於

九月初一日回任十月十八日同知龍興到任知縣
洪英明同縣丞蕭立教先行赴府叅謁本日蒙 採
木李郎中經過本縣各官不在止吏方良言答應十
九日本部按臨該府知縣洪英明縣丞蕭立教懼怕
嗔恠不敢出見致蒙牌差百戶李恩等到府行提該
府轉差應捕姜沐守提各官并該吏徐守志於十月
三十日到府轉解赴部行至省城又值本部出巡瓜
州地方因有本縣倉庫獄囚難以遠離具告本司准
暫回縣候回省另解具呈採木衙門照驗先將蕭立
教徐守志解部獲奉批廻訖等因在卷查得宿應麟

等奏勘事情先該本司節次駁查明白爲照 大工

緊急該府所派木植雖經推官宋璘採買完足於九月二十三等日通行申報十月十八日採木李郎中按臨淳安縣地方未據報有驗烙起運文書查訪採辦事情知縣洪英明縣丞蕭立教俱各赴府不在及至臨府知府宿應麟患病未出而洪英明蕭立教在府又復不行接見事涉怠慢前項木植惟恐遲誤致蒙叅劾等因具呈前來據此案照先奉都察院勘劄該浙江徽州採木工部郎中李方至題該錦衣衛鎮撫司題覆犯人宿應麟叨居郡守遵 旨採木雖稱

買辦已完 命使往來有失恭敬之禮跡涉怠忽責
亦難辭洪應明蕭立教本以卑官自合敬慎却乃有
誤迎送肆意可知雖云各出公差情跡具在以上各
犯俱屬有罪所據宿應麟遵奉 欽依買木已完又
經起運止縣屬失誤迎送一槩被叅但未經查明擅
難准送合候 命下將犯人宿應麟洪英明蕭立教
通送法司監候轉行都察院行浙江巡按御史將宿
應麟所招事情逐一查勘明白如果大木已完又經
起運止是失於迎送則情有可原如大木未完遲慢
誤事徑自從實叅究又該嚴州府淳安縣知縣洪英

明奏爲懇乞 天恩辯明冤抑事俱奉 欽依劄行

查勘知府宿應麟所招事情真確并將知縣洪英明
所奏事理一併查勘施行等因已經備行浙江布政
司查勘隨據該司備由呈覆前來尤恐未的又經駁
行再勘去後今據前因查得原任嚴州府知府宿應
麟淳安縣知縣洪英明疾病公差情跡俱明其洪英
明與原任縣丞蕭立教因新任同知龍興到任空署
赴府叅謁以致採木郎中李方至過臨該縣問採解
事情失於應付疎慢之罪委不能辭其買木一節考
其完驗各有月日稽之領解俱有委官事既有據情

似可原謹將查過前項情節奏乞 勅下法司并查
李方至所奏通議上 請 聖明裁奪施行等因奏
奉 聖旨法司知道欽此案呈到部看得巡按浙江
監察御史王本固題稱查勘過原任嚴州府知府宿
應麟淳安縣知縣洪英明疾病公差情跡俱明洪英
明與原任縣丞蕭立教因新任同知龍興到任空署
赴府懇謁以致採木郎中李方至過臨該府查訪採
鮮事情失於應付回荅其該府縣採買木植考其完
驗各有月日稽之領鮮俱有委官事既有據情似可
原乞要并查李方至所奏通議上 請 聖明裁奪

施行一節爲照見監犯人宿應麟洪英明蕭立教先
該採木郎中李方至惟恐木植遲誤致有叅論被逮
來京奉有明旨行令彼處巡按御史查勘今據御
史王本固勘得前項木植考其完驗各有月日稽之
領解俱有委官事既有據情似可原似應量擬罪名
納贖還職惟復別賜定奪均乞聖裁嘉靖三十七
年閏七月初二日題初四日奉聖旨宿應麟等既
木植不悞准各復職欽此

看擬查勘楊順路楷疏

題爲緊要邊臣欺君誤國大壞邊防乞賜究

治以圖久安事山西清吏司案呈奉本部送刑科抄
出該本部題該 欽差兵科給事中鄭茂題前事素
聖旨刑部看了來說欽此欽遵抄出送司問得犯人
一名楊順年四十八歲原籍山東德州左衛人由嘉
靖二十年進士初授河南原武縣知縣歷陞大同巡
撫右副都御史三十六年三月內轉陞總督宣大兵
部右侍郎兼都察院右僉都御史招稱 云云 今年三
月初七日該刑科吳給事中將順與路楷通同飾罪
大壞邊防事情具本題奉 欽依行間該錦衣衛差
旗校王名齋捧 駕帖前來拏解順與路楷到京續

該錦衣衛題奉

欽依送鎮撫司打問該司備供題

奉

欽依各犯送刑部從重擬罪該司將順比擬守

邊將帥守備不設爲賊所掩襲因而失陷城寨律斬
路楷奏事詐不以實徒罪又看得路楷被劾接受順
饋送銀兩數多及順侵欺官銀妄殺平人情罪深重
事在彼中要行查勘果有實跡照例別擬題奉 欽
依楊順路楷且都監着便差給事中一員會同巡按
御史將奏內事情從實查勘來說欽此隨該 欽差
鄭給事中前去該鎮會同巡按御史調取山西布按
三司分守冀寧道張叅政井陘兵備道蔣副使公同

朔州兵備王副使守巡冀北道叅議史 俞事王

會委直隸深州知州周時中棗強縣知縣楊九韶山西文水縣知縣張誦交城縣知縣宋璫會勘間隨蒙總督楊尚書訪出王通侵欺擒逆馬價并賞功銀兩蒙行朔州兵備道監追問詳間蒙給事中出示曉諭軍民人等有妄殺平人報功侵欺主客兵糧及賞功馬價等項銀兩并各倉場富商已經納過料草遞過領狀未曾支銀或指官扣除或支給不及原數俱自嘉靖三十六年五月起至三十七年四月止各備的確情由赴科呈告以憑施行本年五等月十六等日

秦可大項應宗 民仰劉用光史儒王英張住各將
報功未賞并亢義不行公給賞銀呂應期將獲功願
陞題 請未示張錦將胡典提兵不行救援故縱孔
江薛伏增妄割虜殺伊男張世臣頭冒功及先案問
結義官龐傑將王通侵欺擒逆賞功銀兩別案另結
于迪將張宗奪功與男張守餘冒報圖陞并魏見李
十二等買功賣功姚天祿將桃松寨等逃走李鉄等
將景春侵扣銀兩各情弊具狀俱赴鄭給事中告准
批兩道轉行各官查勘間本年六月內廣足倉原貯
未放賑濟糧奉勘合借支與大同正兵等營不在官

委官張瓚等行糧米一千二百二十三石八斗馬疋
支料豆八百五十石大同左衛委官指揮錢梁等官
軍借支正月分月糧米四百二十六石二斗破胡殘
胡殺胡馬堡四堡倉每倉價銀一千兩原扣坐主客
兵作賑濟米豆各堡亦陸續借放與官軍三十七年
月糧訖井坪倉賑濟糧亦借支與井坪所官軍月糧
米三百三十五石豆二百九十七石俱尚未補還蒙
將龐傑于迪張錦李鈇各詞內干審人卷提獲審得
王通侵欺原收順任內題請擒逆馬價銀六兩一
錢及妄割首級等情是實問擬招呈兩道轉呈鄭給

事中蒙批王通侵剋擒逆銀兩並冒功情弊摘入勘
事招內類報依蒙遵行外周知州等又審張宗奪部
下軍王爵等首功與男張守餘冒驗及魏見李十二
等買賣首級及妄攀王通等情是實已該朔州兵備
道問結張宗照例定叅摘擬張守餘不應事重減等
杖七十納米折價贖罪孔江等殘毀人屍徒罪哨嘹
照出胡鎮青吉張世勲另行陸續招解兩道覆審無
異轉呈鄭給事中詳允案行各官即將王通侵欺擒
逆銀兩割死人頭冒功魏見等冒功張宗奪功及有
罪遊擊胡鎮把總千戶青吉旗牌官張世勲併入勘

事招內聽叅間呂應期奉兵部勘合准陞具由回報
訖各官又將查出各衛委官原領將收貯未用順任
內請討修理城堡墩臺營房馬價未賑糧米支借客
兵錢糧等項銀兩恐有侵冒情弊具呈鄭給事中分
委大同府推官劉旦并大同等衛經歷等官郭邦輔
等親詣各該倉場城堡查得正兵等營官軍借支廣
足倉賑濟米該價銀二千三十九兩六錢六分六釐
馬疋借支豆該價銀一千兩俱應客兵銀內動支大
同左衛官軍借支月糧前銀應於主兵銀內動支見
今管糧岳郎中坐行銀億庫着落通判韓寵候領買

補破殘殺馬四堡官軍支過賑濟米豆原係扣撥客
軍糧料該於主兵銀內動支補還通判韓寵原領召
買抵還客兵糧銀每堡一千兩見今買完米二千石
廣足倉收貯聽候各堡撥軍搬回徑作賑濟井坪所
官軍借支井坪倉糧米亦該主兵銀內動支補還并
將張子現王鑛張堂李松羅鎧等前項侵冒及馬驥
不速完工胡來臣不行督催各情罪通行查出及陽
和等庫見在銀兩俱盤數足各呈繳鄭給事中又蒙
巡按樂御史將胡鑛前項侵盜馬價情弊訪出具本
叅題外各委官知州周時中等先將賑濟米豆借支

補還前情覆查問羅鎧景春王通各又不合將侵欺土頭銀兩實情隱下止將與景春王通劉良弼侵剋銀三千七百六十六兩六錢四分并腳價用過銀兩等情具狀首告妾官周知州等處將銀呈准發大同府寄庫訖節蒙鄭給事中通將姚天祿等并各項應查收放錢糧卷冊吊發兩道轉發各妾官通提各項人犯獲功官軍原斬首級等項到官逐一細加查審姚天祿范紹忠姬仁孟世英各方將原隱故縱降虜蠻帶等四名復逃出邊杜錦李景山提兵坐視不行協捕及崔應奇輒憑虛報妄回桃松寨等被虜擒殺

等情招出各官惟恐不的屢次差人前赴崔應奇處
提取原報軍夜黃友才等覆審伊又不合畏罪占愆
不發及該各官會議姚天祿雖用番語將順等欲送
桃松寨還虜易換丘阜情由漏與樂帶等知然樂帶
等已奉 欽依准收家丁似非敵人難准前議范紹
忠等坐視樂帶等脫走實係故縱亦難擬押解不覺
失囚之律及審得羅鎧王通景春召買糧未曾上納
妄破土頭銀三十三兩八錢六分妄稱先行納官行
准管糧岳郎中手本開稱景春納過土頭銀兩與此
項諸語不同止有一項預買客兵糧餉事景春納過

米土頭銀一兩六錢七分三釐豆土頭銀四兩七錢
四釐數目不投難以抵准的係侵分入已又蒙將胡
鎮在官家人胡俊等提發周知州等會審各執原係
姜安紀五賣馬等情惟恐不的散拘胡鎮前來再三
覆審相同又查路楷原題勘順與朱笈龔業會題捷
疏所載擒斬虜功二百二十六名顆除生擒一名及
官軍楊亨等斬獲首級一百一十八顆並無炙疤網
痕審係真正虜級又驗得叅將王銓并各部千總等
官戴恩等部下首級二十二顆亦無炙疤網痕審係
追斬零騎其餘張國基等原報首級六十八顆驗有

炙疤幼小究係先年被虜今被賊驅攻搶城堡官軍
壯夫拒敵擊打傷死漢人首級又該張叅政蔣副使
親詣被虜地方拘審各該里老覆勘明白行拘應州
結稱去年九月二十四日大舉達賊入境攻毀堡寨
北樓遊擊李漢臣各領兵在城潛住達賊回盡方領
兵還並無與賊對敵懷仁縣結稱賊入境攻堡寨龔
總兵本縣駐劄賊回方領兵出城行至地方坐截橋
哨見達賊奔入本村堡內賊從大谷等口去訖龔總
兵方回鎮並無對敵山陰縣結稱大虜深入攻圍本
縣堡寨搶殺人民並無官軍堵敵等情弊行各要官

查出劉達親報斬首級一顆龔業高良臣各部下報
斬首級四顆共五顆并據原未到地方各部官軍楊
桂等共報斬首級五顆又查王通係軍門供應之官
非從軍征戰之後亦報斬首級一顆通屬詐冒再三
研審究出俱係妄割虜殺漢人首級希圖功陞賞及
該官會看得驗有疤痕張國其等各報功六十八顆
原係虜驅攻圍軍壯打死各役斬割首級比與虜殺
漢人首級者不同俱應免究但既有疤痕難以准錄
原賞銀兩照數追收還官又查得路楷被劾受要楊
順賊銀七千兩原無過付指實其桃松寨脫逃路楷

原無叅題龔業胡鎮等候叅及將各項錢糧被虜攻
毀城堡殺虜人畜等項備細查明與首級各另造冊
呈送具招呈詳間商人胡倫善保將原欠賑濟銀五
千七百五十兩該米二千九百九十石五斗又欠麥
價銀九千兩該米五千一百三十石納完實收在卷
將姚天祿等改擬與王通等具招呈解兩道會同王
副使史叅議王僉事覆審前情無異取供具招連人
呈解鄭給事中詳審蒙駁回分守冀寧道張叅政并
陘兵備蔣副使又經會同朔州兵備王副使守巡冀
北道史叅議王僉事通將姚天祿等一千人証提取

到官重復再三研究前項各情無異問擬姚天祿依邊寨地面但有境內奸細走透消息於外人景春王通俱監守盜庫錢四十貫各斬罪王通係雜犯准徒五年與景春各照例景春斬首示衆王通發邊衛永遠充軍范紹忠孟世英俱押囚故縱與囚同罪至死爲姚天祿從各減等馬其依吏挾勢求索所部內財者計贓准不枉法論一百二十貫罪止馬雲卞春師相霍見張伏郭彥桂鄒大臣郭大金俱殘毀他人死屍各減等徒罪李堯卿周儒殷宗虞張爵陳剛尚德深夏寵姜安紀五司官楊世金李鈇徐卿善保胡倫

衛臣武天福韓經吳合興羅仲仁王尚禮張安劉陽
劉宗元高鐸王學李朝臣俱不應減等杖罪冒陞千
戶麻富劉達蔭襲張守餘并王通軍人師相俱不准
陞級先案問發充軍副總兵吳鼎通判張學詩俱依
在任犯罪去任事發杖以上勿論未到李堂等係供
狀人免提王學等錯寫實收改正未到叅將劉卿指
揮張紳丁堅福勝薛桂周國千戶張雷蔣劉瓏百戶
王斌先已叅問仍照原卷歸結未到通事袁相軍舍
武堂姚尚儒張世臣畢鐸王漢宋世宗宋大才石天
祿衛江趙淮董保屈文傑李世英王尚仁劉成師禮

劉果金紹魯馬汝器李祐史策劉龍張廷王羅世言
邢大林周友成黃友才王文禮吉廷會田黨經歷田
有舍劉良弼俱提問脫逃劉三姐趙全丘富周原通
行沿邊叅守等官嚴督哨守墩軍夜不收緝捕知州
劉大觀遊擊胡鎮李漢臣都指揮秦松指揮張戢胡
來臣閏勲崔應其原章劉英羅鎧高良臣千戶劉達
王文炤王鑛王鎮張堂李松張子現馬驥青吉吳端
李東山杜錦楊桂百戶李林姬仁張宗旗牌張世勲
亢義俱候叅提及看得順於去年秋大舉達賊入犯
應州等處順既不能先事伐謀又不能臨敵制勝以

致墩堡攻毀一百一十餘座人民殺擄共七千七百六十餘名口所報首級率多不明請給錢糧罔臻實效及據桃松寨雖無護送之迹實有縱放之情路楷勘効失事朦朧隱蔽并叅順機宜屢失物論久已不容罪過滿盈國典實難輕貸所當重究以爲邊臣不忠之戒路楷始爲楊順釋罪難免偏護之愆終爲楊順請陞彌枉是非之實所當併究以爲風憲不職之戒及叅原任總兵今提問龔業納賄營私擁兵退怯乘虜退而報捷縱士卒以冒功原任巡撫今爲民朱笈輕負國恩重貽民怨放歸實酬所願罷

斥未盡其辜俱當追論叅議史闕疑許用中副使朱
天俸擬功致起群疑勘事依違未悉知州劉大觀均
承分理之責未見綜核之能通當量加罰治等因通
行題奉 聖旨刑部看議了來說又該順具本為懇
乞 天恩辯明功罪以伸極寃事奏奉 聖旨法司
知道欽此欽遵通抄到部送司將順等問招前情是
實仍擬罪犯議得楊順合仍比依守邊將帥守備不
設為賊所掩襲因而失陷城寨者律斬秋後處決路
楷仍依奏事詐不以實律杖一百徒三年路楷有
大誥減等杖九十徒二年半贖罪完日發回原籍為

民卷查先該原任刑科給事中吳時來題前事奉

聖旨楊順路楷錦衣衛便差官校拏解來京問欽此
續該本衛將二犯拏解來京題奉 欽依送鎮撫司

打問明白叅稱楊順叨居總督寄重兵戎正宜據忠
圖報以紓 宵旰之憂却乃行事張皇有疎邊防之
務衛城久困不破格以解圍村堡傷殘徒張功而自
伐虜婦逃走 國體有傷邊民困窮人情罔恤其迹
已著厥罪難逃路楷巡按兩鎮耳目是司知虜婦之
既逃當據法以實奏勘首功以從疑致人言之可指
憲體罔諸罪應同科等因題奉 聖旨各犯送刑部

從重擬罪欽此該本部遵奉 明旨查據鎮撫司招

叅將二犯問擬前罪題奉 欽依 勅差兵科給事

中鄭茂前去該鎮會同巡按直隸御史樂尚約查勘

具奏前來題奉 欽依抄出送司仍擬前罪通查案

呈到部看得該司呈稱該兵科給事中鄭茂題稱會

勘過楊順路楷各前項事情及問擬過犯人姚天祿

景春各斬罪王通雜犯死罪引例充軍范紹忠等一

十一名各減等徒罪李堯卿等二十七名各減等杖

罪吳鼎張學詩俱在任犯罪去任事發杖以上勿論

冒陞廕襲麻富等四名不准陞級通事袁相軍人武

堂等三十三名俱應提問劉卿等一十一名照原問
歸結脫逃劉三姐等四名口行邊叅守等官緝捕未
到李堂等免提王學等准令改正供明方世爵等各
查發及叅稱楊順路楷再加議擬龔業朱笈再加追
論史闕疑等三員與劉大觀量加罰治胡鎮等二十
九名通加究問及據該司問擬楊順仍比依守邊將
帥守備不設爲賊所掩襲因而失陷城寨斬罪路楷
仍依奏事詐不以實徒罪各一節爲照犯人姚天祿
景春王通及范紹忠等一十一名李堯卿等二十七
名吳鼎等二名麻富等四名袁相等三十三名劉卿

一、東、金、年、ノ、フ、シ、ニ、一

二

三、十、月、

等一十一名前項情罪參詳律例俱合相應依擬胡
鎮等二十九名并三姐等四名口委俱違法相應提
問緝拏及照總督楊順先該言官論劾鎮撫司打問
題送法司從重擬罪以爲人臣欺君誤國大壞
邊防不忠不職之戒奉聖旨各犯送刑部從重擬
罪欽此彼時大同西界十分危急若非嚴加懲治無
以震盪邊臣等謹遵明旨將楊順從重比擬守
備不設失陷城寨斬罪路楷奏事不實徒罪罷職爲
民仍乞差官將各犯失事贓私等逐一從實勘明具
奏上請以俟宸斷蒙差給事中鄭茂會同彼處

巡按御史樂尚約查勘去後今據會勘各項事情明白具奏前來除首級不明錢糧費用夷婦脫逃各罪外其失事之實一則攻毀墩堡一百一十一座一則殺擄人民七千七百餘名口事干邊防法難輕貸該司仍擬前罪事不爲過但查得節年各邊失事總督巡撫等官被劾被逮者如宣大總督翟鵬巡撫龍大有陝西總督張珩巡撫張子立皆荷聖明裁允比律發邊遠充軍今照楊順情罪似與翟鵬等相同及該本犯奏辯地方饑饉兵馬羸弱虜勢猖獗墻垣傾圯已逾十年自任總督即有虜困西衛之變亦

曾積有微勞所據情詞委有可矜況該給事中鄭茂
等會勘具 奏前來亦稱乞 勅該部再加議擬相
應酌處合無將楊順查照先年失事總督等官翟鵬
等比律及矜疑事例送兵部定發邊遠充軍路楷仍
依原擬罷職爲民原任總兵官龔業仍聽原案歸結
原任巡撫朱笈另行提問叅議等官吏闕疑等四員
量加罰治惟復別 賜定奪但 恩威出自 朝廷
臣等未敢擅擬均乞 聖裁 勅下本部欽遵備咨
各衙門一體遵照施行嘉靖三十七年閏七月初六
日題初八日奉 聖旨楊順着送兵部定衛發遣路

楷既勘無受賊情弊降雜職邊方用龔業朱笈依擬
史闕疑等各罰俸三箇月欽此

覆殘割被害漢人首級疏

題爲據悉愚衷再陳邊務以備採擇以替修攘事准
山東清吏司案呈奉本部送兵部咨職方清吏司案
呈奉本部送兵科抄出兵科給事中鄭茂題內開七
曰申禁例臣惟人情猶水也愈趨則愈潰法律猶防
也不竣則不止今邊政廢壞乃狂瀾倒潰之時而妄
報首功尤爲邊人所深痛憤急宜杜塞以絕禍階臣
嘗細詢其故大抵多於堡寨攻毀之後戕殘被害之

人維時虜騎縱橫居人荼毒或其族屬而殲之則雖有戕殘無從辯識即有族屬亦且展轉流離雖欲辯識亦不知其爲誰何故往往埋沒而無聞中間背華投夷作爲鄉導助彼兇虐者僅百之二三耳甚則於曠莽崖谷之中爲誘致撲取之計此其稔惡不逞視禦人殆又甚焉夫兵以衛民而反以戕民兵以彌禍而反以生禍人之稱欺兵也奚義哉臣惟妄殺平民者律有正條欺固殺無赦矣至於妄割死首原無正律邊方各發率以殘毀之條問斷不過徒三年而已臣竊爲二者迹雖相類情寔不同一槩論擬似未足

以盡其辜而洩神人之憤也請 勅法司再加詳議
但有妄割被害漢人首級者即以故殺論或立爲極
重煙瘴充軍之例其管隊以上官員俱痛加罰治仍
行令紀功官員嚴加禁諭但有多疤網痕迹涉可疑
者許各村堡被害之家詣庭辯認既得其真即坐以
前律庶幾法紀森嚴群情警惕自不敢輕犯 憲典
自貽伊戚矣等因奉 聖旨該部看了來說欽此抄
出送司案呈到部看係刑部掌行咨部送司查得問
刑條例一款凡臨陣報有斬獲賊級紀功官從公審
驗若有用錢買者賣者俱問罪係官旗就在本衛係

軍發邊衛民并軍丁人等發附近俱充軍若強奪他人首級冒報功次者軍民舍餘人等亦照前發遣官旗降原職役一級京衛調外衛外衛調邊衛原係邊衛者調極邊衛分俱帶俸差操將官及守備把總等官替人冒報功次者亦奏請降調若虜寇犯邊官軍明知被虜人口遺棄在彼因而妄殺冒作賊級或虜寇近邊劄營猶未入境官軍覬知寡弱乘機擣穴斬獲老弱婦女妄作犯邊以圖功次陞賞與殺平人者一體論斷通查案呈到部看得給事中鄭茂題稱妄割死首原無正律邊方告發率以殘毀問斷未盡

其事欲行詳議如有妄割被害漢人首級者
殺論或立爲極邊煙瘴充軍之例其管隊以上官與
俱瘴加罰治一節爲照官軍妄割被害漢人首級此
係各邊掩罪飭功積弊本官役行大同耳聞目擊有
此論奏無非全貲豁破奸欺以清首功之意但有妄
割死首終與生者有間若擬故殺不無過重本官亦
欲立爲極邊煙瘴充軍之例相應議擬查有前例合
行申明比照今後凡有妄割被害漢人首級冒報功
次者俱照強奪他人首級事例軍發邊衛民并軍丁
人等發附近俱充軍官旗降原職役一級京衛調外

嘉靖三十七年九月
衛外衛調邊衛原係邊衛者調極邊衛分俱帶俸差
操管隊以上官員及替人冒報者亦奏請降調庶
情法適中足爲殘毀妄冒者之戒合候命下移咨
兵部轉行各該總督軍門一體遵照施行仍着爲例
以俟遵守嘉靖三十七年九月初二日題初四日奉
旨是欽此